

成化

皇華集

五

皇華集卷之九編目

成化十二年丙申頒冊立

皇太子詔使二

凡外十二平丙申餘冊立

皇太子隨刻二

皇華集卷之六辭目

皇華集卷之九

朝鮮雜詠

祁順

三韓風物途中嘗詠一二有未盡者茲復形
於筆端第淺拙無足爲諸君子道也平時學
識最疎入仕以來又將廿載而每役心於政
事之內其如筆硯荒落何對景強成恒自抱
愧惟希郢正以副所懷

我戡安州城西有清川水孤隋昔爭強遠略數千里
師勞力不逮遇敵先披靡堂堂大將軍此地親戰歿
古人戒貪兵知者曾有幾秦穆敗殽函往事同一軌

千年川上波不洗奔亡耻

其二

沮江何處來遶郭清一泓漢家復秦徼於此別疆界
李唐務爭戰肆毒比蜂蠆我嗟朝天石幾度觀勝敗
東流無盡時今古一砰湃悠悠春江雲還鎖青山外

其三

平壤多流水發盧河更清有唐恣吞噬將士頻東征
李侯率偏帥來破新羅兵俘囚餘萬計歷歲凡四更
徒因一朝捷博此千載名當時交刃處古渡扁舟橫
漁翁伴鷗鷺終日兩忘形

其四

海州隣甕津陸地逾百里西南距中華巨浸無涯涘
傳聞端拱初宋使嘗經此東牟逢麗人舟楫能指示
來從芝崗島風便兩日耳脩程素難涉斯役何其易
往事空茫茫鯨波望中起

其五

朝鮮津水急過客頻登臨紅裳絕踪迹白鳥自浮沉
昔年提壺叟一去無回音箜篌動所思傷彼麗玉心
徘徊寫哀嘆聽者咸霑襟所以琴中曲遺聲傳至今
謫仙與長吉感慨有豪吟

其六

金巖接寶山相去纔咫尺林巒弄輝光逕路多赭色
坤靈孕富媪所產輒竒特旣堪方麗水亦可比垂棘
我聞古賢士義利中不惑外物雖足珍視之猶瓦礫
而况治國家輕重尤當擇九經次尊賢賤貨而貴德

其七

六鰲戴三山千仞浮海面昔人求神仙可望不可見
徒令方外士欺世逞夸衒謬予獲東遊海島看欲遍
驚濤破萬里乘此天風便麻姑笑相邀錯落開華宴
醉呼王方平來問水清淺

其八

中國有嵩岳降神生甫申一時建功烈萬古揚芳塵
神嵩在三韓雄勝亦有聞英靈賦人物嘗作邦家珍
乾坤氣不息山水名猶新生才不限地孰謂秦無人

其九

亭亭扶桑樹盤結滄海東兩幹連根株散作金碧叢
羲和蘊靈巧分得造化功尋常出異繭狀與甕盎同
彌羅暨靈池一見皆下風誰能拔其尤置向文房中
製成五色錦上獻蓬萊宮

其十

東藩好樓臺壯觀臨海嶠朱簾捲風月有景供詩料
使君事幽尋到處一登眺心閒眼界寬忘却在邊徼
仲宣聊消憂阮籍幾長嘯醉來亦狂吟不作相思調
遙遙望京師歸興先飛鳥

次韻

徐居正

隋家事遠征勞師渡遼水旌旗翳白日舳艫彌千
里威靈振東海城守俱風靡一朝兵不戒將軍陣
前死晉陽真天人好大亦無幾剛強不足恃勝敗
無定軌年年江自波欲雪萬古耻
妙香山嵯峨沮水發源派來經松壤都襟抱玄菟

界古來爭戰地毒螫劇羣蠱緬懷隋與唐紛紛幾
成敗往事旣如此江流自澎湃窮黷古所戒虛內
而事外

檀君逝已久箕子遺風清民淳俗可封井地仍薄
征東明天帝孫富國能強兵孱孫失其道戰伐飽
所更堂堂李將軍克捷成大名王氏開西京雉堞
天中橫我朝作東藩金湯壯地形

瞻彼首陽山盤根幾千里茫茫西海水極目無涯
洙昔人一何奇來往倏彼此無因躡其踪有術不
我示望望去何之颯颯風生耳至今已千載欲尋

良不易獨立望大洋日暮風濤起

海州有首陽山

津流何大急大急不可臨公平無渡河渡河煙沉
沉良人去騎鯨青鳥無來音紅顏隨以逝一一愁
人心我聞箜篌引浪浪霑我襟珍重霍里子聲名
橫古今謫仙不可作聊效西崑吟

有金四可知所寶非璧尺嗟哉崑與山揭號何物
色煌煌天上使矯矯百夫特惟善以爲寶清風動
槐棘孔兄非所友蕙苾難眩惑投我以明月報之
愧沙礫貴義而賤貨二者在所擇願保千金軀千
載崇令德

丹丘有羽人雪膚仍玉面六鰲頭戴山蓬瀛時隱
見袖有黃金丹飛騰術已銜飄然駕笙鶴九洲遊
已遍上界十二樓仙風吹又便玉盤千年桃拜獻
瑤池宴我欲徃從之弱水今清淺

有箕生傳說有嵩乃降申豪傑應時出千載流香
塵先生光岳精聲名四海聞舉舉瀛洲仙堂堂廊
廟珍奉使來我邦風裁一何新君看九州外或亦
有其人

海上有扶桑旭日出其東琅玕以爲幹珊瑚以爲
叢金雞棲其上仙蠶騁神功五色成文章商雲光

相同可以資黼黻萬國宣
皇風我欲解一纜飲
馬咸池中手摘如甕繭爲獻明光宮

白日照中天重陰捲海嶠行行過朝鮮往事亦難
料有樓可徙倚有山可登眺豪氣盖九州聲名溢
荒徼壯此風雲懷渾成霹靂嘯慷慨多新詩一一
陽春調我今挹下風斥鷃愧鵬鳥

宴中用女樂非所安也途中曾有詩却之矣恐
未見信仍奉絕句二章

祁順

聖朝風化萬方瞻男女綱常貴謹嚴爲語紅粧早歸
去莫教還露玉纖纖

其二

鐵石心腸宋廣平一生孤特最知名
幽盟只與寒梅共不爲閒花別動情

次韻

徐居正

大平館裏起遐瞻松竹前頭雪政嚴
惟有多情陌上柳春風枉學舞腰纖

牧之清節負生平贏得青樓薄倖名
多君索共梅花笑鐵石心肝冰雪情

三行粉黛動人瞻秩秩賓筵禮亦嚴
文武弛張曾有道煩君休怪楚腰纖

曾聞前代樂昇平亦有梨園弟子名自是東韓遵
古禮敢將雲雨惱高情

孔子之道大而能博雖游夏之賢不能贊一辭
顧我何如人也敢妄言左右茲奉正使祁大人
命聊賦七言絕句一首以見意幸在座諸公勿
以鄙拙爲誚

張瑾

尼父綱常萬代師式車來拜起遐思當時尚有乘桴
意廟貌何妨遍九夷

余與左司張君廷玉奉使抵三韓同謁先師孔
子廟廷玉賦七絕一首余因和之 祁順

杏壇深處謁先師曲阜雲山入望思薦罷芳芹畱戀
久一番時雨遍東夷

短句未足盡懷再賦一律

朝鮮詩禮獨稱雄孔廟規模上國同數仞門牆無路
入千年絲竹有神通斯文自與天長久吾道常如日
正中四海車書今一統典章何處不尊崇

坐中獲覩諸生所作文賦因贈以詩

青袍濟濟列生徒千里驍驪汗血駒論秀遠規周俊
士慕華同事魯真儒功名自古非難事道德由來是
坦途莫學隋唐昧根本只將詞賦費功夫

次副使韻

徐居正

宣聖堂堂百世師
鑽堅瞻忽起余思
萬古時中明日月
休論和惠與清夷

春秋一作任君師
麟自呈祥慰我思
二百四十年筆削
尊王抑霸辨華夷

斯文千載仰先師
詩禮傳家到子思
道統至今來有自
綱常寧復間華夷

成均館司成許琮

巍巍百世有先師
性道還應學子思
又有九疇遺教在
一方民物屬清夷

千載留侯作帝師典刑猶在起余思知君必有翻
江手九曲新歌繼武夷

成均館司成李繼孫

才頒帝詔謁先師一炷心香儼若思更從函丈
開言論吾黨爭欣不鄙夷

右承旨任士洪

仲尼真箇百王師道統相傳至子思肅肅廟庭東
海上斯文元不限華夷

升堂入室聖爲師千古令人幾詠思百世兩楹王
者祀數聲金石感希夷

愧將樗散忝司徒喜拜高軒欲繫駒浩漭文章是
餘事從容道德合明儒發揮先聖淵源趣開示愚
生耳目途萬里行裝唯一鶴清風亦足起廉夫

李繼孫

天上皇華使節雄聯翩雙鳳羽儀同謁廟尊師申
景仰談經究理詣精通範模已在觀瞻表文字仍
歸飲興中揮得綵毫驚寶唾詩壇知復幾層崇
列行衿佩是吾徒聲價他年千里駒貯作成人歸
有德思齊君子願爲儒書文豈異夷兼夏性理元
同舜與途講席追陪真忝竊叨將教胄愧庸夫

都承旨柳 輕

二星文彩一時雄
雙壁連茵氣槩同
七步才名驚鬼泣
四知清節鄙錢通
煙雲不廢詩書裏
談笑還成尊俎中
此日摳衣函丈下
仰瞻山斗更崇崇
青衿濟濟孔門徒
盡是軒昂萬里駒
共擬菁莪周造士
不論章句漢諸儒
披雲已得瞻聯壁
望道何曾廢半途
願住雙旌且終日
從容色笑誨凡夫

任士洪

唐家李杜漢揚雄
民部今看步驟同
作賦每驚風格老
吟詩不屑語音通
道存縫掖從容處
節駐菁

莪樂育中自愧持蠡難測海猶瞻數仞仰崇崇
落落高標孰與徒從游璧水愧轅駒詞華已壓三
都賦經術休誇兩漢儒吾道孔曾元一貫斯文夷
夏豈殊途臯比幸得承顏色餘論時猶起懦夫

明日有遊江之約未知風雨肯晴否妄賦一律

柬同遊諸公

祁順

海國東來感異鄉醉中懷抱爲詩狂煙花轉覺清明
近風雨都隨寒食忙作訟豈無韓吏部出遊應有段
文昌漢江佳致傳聞久願借春晴泛畫航

次韻

徐居正

寒食清明又遠鄉不堪風雨枉顛狂漢江行樂唯
須早花渡歸心亦太忙勝水佳山同北固地靈人
傑擬南昌從教扶醉歸來晚月色如銀滿野航

登漢江樓次議政徐君佳作

祁順

樓前風捲白雲開坐看羣山紫翠堆百濟地形臨水
盡五臺泉脉自天來題詩愧乏崔郎句對酒難辭太
白杯花鳥滿前春景好不妨談笑更遲徊

其二

春雨初收天氣高漢江新水綠盈篙雲邊丹詔來
雙鳳海上青山駕六鼇遶郭晴光搖麥浪隔簾幽響

散松濤斯文簪盍須酬唱莫負詩中第一豪

和徐叅贊詩韻

張瑾

層樓瀟灑面江開江湧沙堆似雪堆數點白鷗驚棹
去一天紅日漾波來簾前風景添詩興座上儒紳醉
酒杯最喜聖朝聲教遠殊方持節得徘徊

原韻

徐居正

陪遊漢江樓承雅命先賦近體二首錄奉
求正退之詩曰投章類稿帶佇答逾兼金
僕以拙作安敢妄擬縞帶但冀和教耳無
任慚汗之至

樓中佳麗錦筵開樓外青山翠似堆風月不隨黃
鶴去煙波長送白鷗來登臨酬唱三千首賓主風
流一百杯更待夜深吹玉笛月明牛斗共徘徊
漢江春漲碧葡萄雨後新添復幾篙一纜徐牽驚
白鳥三山高挿跨金鼇銀盤細膾飛紅縷玉笋香
醪皺綠濤星使文章驚滿座詩成如我更麤豪

次韻

尹子雲

危樓珠箔向江開隔檻風搖翠浪堆山點青螺蓬
島近水連銀漢使查來題詩且可畱千首把酒還
須復一杯勝地春光難再得莫催歸騎更遲徊

倚遍雕闌眼界高
還隨漁父動輕篙
天空正可招仙鶴
海近猶堪釣巨鰲
青草白沙迷遠島
淡煙斜日接洪濤
傍人指點舟中客
不是詩顛卽酒豪

金守溫

西湖春晚欲花開
崇酒千瓶肉百堆
一札璽書從日下
九重霄漢使星來
山河表裏文侯國
賓主懽娛太白杯
高閣暫辭相揖罷
彩舟江上更徘徊
春水纔生一丈高
漁翁新試去年篙
燕都有客來雙鳳
龍伯何人釣巨鰲
少海重輪千載慶
白鷗黃鶴一江濤
珠璣滿把吟哦久
始識詩壇第一豪

任元濬

高樓登眺好懷開
遠近峰巒錦作堆
入網銀鱗苞白送
滿盤金橘寄黃來
佳人解唱鷓鴣調
座客還傾鸚鵡杯
未盡登臨無限興
更移蘭棹重徘徊
晚憑危檻碧天高
一曲清江穩著篙
坐占白沙機狎鳥
胸吞滄海釣連鰲
舟中興在一杯酒
醉後詞翻三峽濤
太白蘇仙今已矣
不知今日復誰豪

盧思慎

宿雨初收霽色開
樓前春水碧雲堆
江煙漠漠風吹捲
山翠霏霏鳥帶來
舟牽錦纜歸花渡
酒瀉銀

潢落玉杯歡會幾何離別易且將光景重徘徊
春江夜雨漲葡萄曉棹蘭舟沒半篙天上羽儀來
綵鳳空中樓閣跨靈鼇珠簾乍捲山開畫綵筆閒
揮海感濤笑倚闌干拚一醉元龍百尺氣增豪

成任

樓前春水鏡奩開樓外青山翠幾堆厨子已傳金
果至漁人爭送錦鱗來流連光景憑詩句消遣情
懷有酒杯江上夕陽無限好輕舟畱醉且徘徊
雨後蒼江幾尺高朝來忽覺沒春篙人間歲月如
飛鳥海上雲煙隔巨鼇春到漸知花似海杯擎且

喜酒生濤舟中衮衮通談笑醉裏詩成語更豪

李承召

青山面面錦屏開春水初肥雪浪堆宿雨無端今日霽天公應爲使星來吟看溪柳黃金線醉倒官壺白玉杯百丈徐牽綠翠壁天光雲影共徘徊金尊歛灩漲葡萄移上樓船水一篙醉去何辭一斗酒興酣欲釣三山鰲舟人蕩槳回煙渚稚子攀罾漾翠濤十里江山開遠矚春光駘蕩助詩豪

柳 輕

危樓百尺倚天開俯瞰羣山翠作堆遶郭青嵐浮

日去滿江蒼雪送潮來
葦間舟子晴川曲天上仙
郎紫玉杯一笑相逢那易得
且將詩酒更徘徊
樓中春色紫葡萄樓下春流漲
半篙天近手堪攀
日月地浮身欲跨鯨鰲
詩從筆底披千錦香滿杯
心捲素濤極目長江波渺渺
倚闌高興晚來豪

任士洪

蘭橈一棹水紋開
面面羣山紫翠堆
風送鴈聲天外盡
日斜帆影鏡中來
招邀暮景供詩興
邂逅清談屬酒杯
爲報皇華畱一醉
相隨鷗鳥且低徊
南江春暖漲葡萄
細雨肥添水半篙
客路三千馳

玉節仙山十二隱金鰲酒花爛熳浮人面筆力縱橫捲海濤芳草晴川多勝賞古今登眺幾英豪

蒲江紅調二闕

祁順

樓中近體詩已多欲另作一體未審衆意何若

漢水風光人盡道海邦希有莫不是天生奇勝地分靈秀金馬郡城傳自昔新羅人物皆非舊記唐家都府亦畱名熊津口

鷗鳥狎魚龍吼山入畫江如酒使遊人到此貪懽忘久佳會合超滕閣上幽情不在蘭亭後恐明朝一別

隔層雲空回首

效顰

徐居正

尺五城南形勝地畜眼未有自太古尾星分野巨
鼇孕秀宅都定鼎金湯堅分裂元非麗濟舊蘭漿
桂棹風流行樂漢江口

鷁首飛鼉面吼瑠璃鍾琥珀酒使佳會安得天長
地久江山是壺中物外人物非王前盧後明日參
商南北何處空搔首

漢江之遊叅贊徐君賦律詩二章旣和之矣然
佳景非常豈宜少詠因再賦一律置於舟中

張瑾

趁此風光好放船大江春暖水如天
岸頭楊柳將舒綠沙上鳬雛正穩眠
白鶴不來雲漠漠洞簫吹起浪濺濺
蘇公風月堪同調落日還看錦纜牽

次韻

徐居正

西湖落日泛樓船人在蒼茫鏡裏天
錦纜牙樯驚鷺夢鷗絃鐵撥起龍眠山
當鯨海青還盃水到蠶頭碧更濺雨
散雲離明日事回頭漢水夢相牽

漢江舟中和張左司大人

祁順

江頭風景滿樓船花柳爭妍二月天
帆影帶將飛鳥

去笛聲驚起老龍眠山連兩岸雲林合石激中流雪
浪濺莫怪東來好遊賞尋常詩酒慣相牽

次韻

徐居正

楊花渡口繫蘭船須信人間別有天不必神仙同
鶴駕要將圖畫倩龍眠日明鰲背黃金浪風撼龍
頭碧玉濺須把西湖比西子江山其奈興相牽

金守溫

春江勝日棹樓船帆影參差鏡裏天官渡日斜人
自集釣磯煙暝鷺閒眠詩腸任却因風就酒面從
教灑水濺何幸得陪天上客肯携高袂醉相牽

尹子雲

春風遲日下江船把酒吟詩倚暮天
蜃氣似樓山似劒桃花如笑柳如眠
一聲長笛連雲迥數點飛鷗拂水濺
更續一杯須痛飲明朝只怕別愁牽

李承召

選勝來遊泛畫船春江新漲水如天
狂吟準擬壺中景爛醉渾疑水底眠
落日下山還淡淡橫颿激浪更濺濺
坡仙千古風流在欲去翻爲晚興牽

成任

銀濤搖蕩渡頭船淺碧平涵萬里天
春氣暗隨玄

鳥至歌聲驚起白鷗眠
尊一詠詩多態擊楫中
流浪幾濺錦纜未宜收
落日更携餘興且須牽

江遊樂趣何限適有拙作未盡所懷再賦七言

一律

祁順

倚罷高樓未盡情又携春色泛空明
人隨竹葉杯中醉舟向楊花渡口橫
東海微茫孤島沒南山蒼翠淡雲生
從前會得江湖樂今日襟懷百倍清

次韻

徐居正

風流江海十年情坐對湖光潑眼明
山似高懷長偃蹇水如健筆更縱橫
柁樓舉酒日初落官渡哦

詩潮自生更待月明扶醉去杏花疎影不禁清
登樓豪氣有餘情泛艇西湖一鑑明酒量已嫌江
海窄劒光直上斗牛橫祁奚好善傳家有徐邈狂
言故態生揮麈高談客未散楊花渡口管絃清

成任

萬疊山含萬古情春風遠客眼雙明連村楊柳千
條嫩罨島雲煙一抹橫鴉閃夕陽金背耿魚吹輕
浪翠紋生江湖滿地襟懷豁擬趁仙槎躡大清
芳洲何處寄閒情鷗鳥飛來眼忽明殘日曳紅波
上艷亂山浮翠岸頭橫風流肯阻舟中樂酬唱時

同海外生人物百年寧易得冰壺今見使華清

龍頭山晚酌

祁順

步上龍頭第一峰煙光無限興何窮
四旁山水詩情外萬里乾坤望眼中
村舍北連城郭近漁舟西去海門通
主人置酒頻畱客不覺殘陽失晚紅

次韻

徐居正

解纜初登渡口峰奇觀愈富思無窮
生來氣習詩三上今復豪狂酒一中
山勢周遭天宇迥江聲斷續海潮通
座中盡是神仙客咫尺東華隔軟紅

又用前韻拗體

西湖之西蠶頭峰千古萬古江無窮長天欲盡去
鳥外落霞已齊孤鶩中騎危却怕斗牛近浮槎直
與河漢通春酒春江孰深淺夕照一抹芙蓉紅

盧思慎

山回遠勢結奇峰登眺何曾望眼窮疑是瀛洲方
丈裏不然雲夢岳陽中仰攀銀漢星辰近俯瞰馮
夷窟穴通更對青樽成好興任看斜日半山紅

登楊花渡龍頭峰

張瑾

纔過楊花渡一灣頭龍峰上又躋攀憑高望見長安
路欲倩行雲載我還

其二

共上龍山眺晚晴
白鷗洲渚幾舟橫
漁歸遠浦人歸舍
十二峰頭月欲明

次韻

徐居正

漢水春風碧玉灣
楊花嶺上共登攀
使華藩國風流地
大覺昇平氣像還
西湖歛灩又春晴
豪氣元龍意氣橫
青嶂白鷗圖畫裏
一竿斜日半江明

盧思慎

龍岑勝地壓江灣
不許遊人取次攀
今日使輶來

駐節一杯相屬却忘還

長空雲淨雨初晴
畫舫前頭一笛橫
西望海門千萬里
夕陽波上片帆明

登太平館樓

張瑾

承恩使藩國迢迢逾海陬
江山麗春日時登太平樓
凭闌一遐眺景物豁雙眸
郊南殘雪盡天際浮雲收
行人念歸路拂鬱多離愁
翻思千里外身世尚悠悠
延頸望西北天闕五雲頭
東藩厚風俗吾將達宸旒

次韻

徐居正

皎皎白玉京遙遙滄海陬駕言使者輶來登賓館
樓俛仰一今古徙倚凝兩眸長嘯吐虹霓豪氣浩
不收信美非吾土旅况兼春愁燕山鬱岌岌鶴野
何悠悠薄言賦旋歸行行大刀頭下可慰親慈上
可答 冕旒

順使朝鮮屢與 國王相接心甚嘉之盖其妙
齡秀穎崇學好儒威德旁敷一邦輯睦誠他邦
所罕儷也竣事比還宴別慕華之館敬賦拙律
以達微忱

祁 順

恩詔宣傳自 帝都 賢王相見卽心孚齊階下拜

威顏近晉地謙盟禮意殊治國才名光玉檢照人丰
采徹冰壺忠勤一念思無斃永固箕封舊版圖

予同祁戶部奉使朝鮮國王秉禮非常且眷
待獨厚臨行無以爲謝因賦一律以致意耳詩
云乎哉

張瑾

偉哉東國此賢王導率羣臣入憲章一代儀文周
典禮百年文物漢衣裳徘徊日久難爲別眷顧情深
獨異常自愧臨行何以謝歸朝一一達吾皇

宴別慕華館中月山君索詩爲贈因賦一律畀
之兼柬其宗親諸君子

祁順

濟濟衣冠重禮文東藩疆土列封君累朝支派今尤
盛五部豪華古亦聞公族詠譎麟比德高岡鳴集鳳
成羣慕華亭館開城路醉罷瓊筵惜袂分

舟渡臨津承惠佳作依韻奉答深愧不工

江頭開宴風物新炊香泛綠烹鮮鱗美人同傾藥玉
船舟聯李郭如登仙風恬日暖波不驚隔岸一帶山
光橫舉頭却念京華邈五色祥雲連碧落詩翁佳句
超黃初瓊琚玉珮頻遺予自慚蹇拙虛流年東來勝
覽非偶然平生胸次慕李白只恨千鍾消未得登臨
賦詠曾幾何可堪歸騎凌風沙鴨綠迢迢限南北暮

雲春樹情無極

再和

前村雨過江水新
山涵螺黛波
感鱗春光滿座酒滿
船衣冠總是華陽仙
詩成不管魑魅驚
千軍筆陣縱復橫
鳶魚飛躍道豈邈
雲影天光鏡中落
憶昨使節經遊初
江山佳趣能助予
予今豪邁非少年
相逢不飲應徒然
狂來還喚江鷗白
欲共忘機忘未得
功名相伴知奈何
東華車馬多塵沙
還朝正在天之北
萬里扶桑望何極

原韻

徐居正

春光駘蕩天氣新春江綠漲生玉鱗長風吹吹泛
樓船兩使風彩如神仙豪吟已見蛟龍驚揮毫落
紙雲煙橫座間中聖老徐邈狂言屢發何磊落明
日况是暮春初蘭亭渺渺能起予蘇仙風流四百
年赤壁風月今依然詩如不成可浮白人生佳會
難再得嗚呼樂極悲奈何聚散自古如搏沙他日
相思杳南北江草江花豈終極

卽席伏承和韻巧速無比不揆鄙拙復步韻
錄奉博笑

臨津江水藍色新初日照耀黃金鱗春醅歛灩棹

觥船縱筆試學東坡仙先生高談四座驚先生意
氣霜鶻橫予生荒陬之渺邈有材無用空濩落憶
昔少年賦遂初至今白髮能愁予堯夫生死太平
年平生得失俱茫然文章何用追甫白亦可安排
隨所得詩成話別可奈何塞天漠漠飛黃沙我自
東還君已北落日看看下鰲極

重渡臨津江議政徐君示詩旣和之矣佳景如
斯不宜少詠再賦一律置于舟中 祁 順

四牡忽忽經海邦歸程又渡臨津江青山倒浸幾千
丈白鳥齊飛三五雙風灑殘雲點客袂魚吹細浪侵

蓬窗醉來含笑問歡伯多少離愁因爾降

次韻

徐居正

千古東藩是我邦金湯襟抱壯湖江
天恩已感彤弓一星使驚看白壁雙
湯網恢恢洞三面堯門蕩蕩開八窗
地官高調誰能和詩壘幢幡已豎降
敬和三月途中之作
祁順

三月風光屬禁煙踏青時節艷陽天
倦行驛路魂堪斷遠望鄉園夢亦牽
洛水有觴曾泛羽楚山無樹不啼鶻
詩來忽動傷春思一度微吟一黯然

其二

客懷如醉復如愁四十流年又向三修契未成新宴
會賜筵偏憶舊朝叅魏王堤老煙塵合公主園荒草
木酣惟有浴沂謠詠好清風長在魯城南

原韻

徐居正

三月三日途中且遇寒食述懷錄奉賜粢
江湖索莫斷人煙百五正當寒食天節物今年差
較晚風光觸處動相牽金巖日暖初楊柳劒水春
寒未杜鵑辜負踏青酬令節客中時序劇悠然
桃花癡少杏花愁旅館風情三月三杜甫麗人今
不見羲之禊會邈難叅登樓作賦憑豪氣把筆題

詩倚半酣上巳當年屬何處龍泉西畔鳳山南

又用前韻

春深客路好風煙又值清明上巳天幾樹早花仍
雪澁千條弱柳受風牽似聞遼左有歸鶴何處涪
南無杜鵑腸斷關西二三月感時傷別思茫然
老病心懷已大憊人情飽閱狙四三自知驢技止
如此今愧龍門猶謬叅白雪陽春難報答暖風晴
日轉清酣使華高節如君少端合才名斗以南

承佳詠有所感發再賦五絕十首 祁順

握蘭逢上巳改火逼清明佳節行邊度那能不愴情

其二

三春今過二桃杏未開
花獨有庭前草纖纖長翠芽

其三

上國春如海幾番花信風
雲山遮不斷吹到鴨江東

其四

寒食節初到遠遊人未歸
思親意何限遙逐白雲飛

其五

淺白催蒲笋輕黃染柳條
如何春漸老不聽一聲嬌

其六

隔歲辭京國中途過暮春
跳丸將老我推轂屬何人

其七

煙火自闌珊東風晚尚寒美人招不至何處采芳蘭

其八

有酒酬清景何須泛曲流憑將青艾餅取次上盤羞

其九

春老猶傷別愁多強賦詩故人霄漢上今日集西池

其十

琴尊唐大學觴詠晉蘭亭舊事悠悠盡芳辰冉冉經

次韻

徐居正

清明又寒食節序去分明白髮非春事臨流空復

情

春山仍臙雪三月猶未花昨夜已雷蟄抽抽初筍芽

江城杏花雨盡日芳草風客路幾千里雲山西復東

山禽亦何事喚起又催歸最愛重來燕年年傍主飛

依依陌上柳萬萬黃金條折以持贈客莫學女兒嬌

客路定何處送君兼送春長江去不盡日暮愁殺

人

貂裘尚三月惻惻春政寒一別四千里頻年吟澧

蘭

忽忽已春晚行行恰得詩似曾相識我燕子故差池

傳家舊清白落落非時流君橐金寧浼我囊錢已羞

相逢一萍水歲月如郵亭白鬢悲青鏡別離飽所經

重過金郊館

張瑾

又過金郊驛歸途第幾程好風吹綉旆名馬絡繁纓
轉覺吟懷壯偏憐景况清遠人敦禮義萬世拱
明

次韻

徐居正

九重紆睿想萬里數歸程蘇武曾持節終軍舊
請纓風雲開際會天地屬寧清好展經綸手蜚騰
佐聖明

重過龍泉六言

張瑾

奉使東來西去沿途柳綠桃紅寒食清明時節宦情
鄉思無窮

其二

屋外青山遠近橋頭流水東西使客歸槎住此劒光
高射虹霓

次韻

徐居正

亭柳輕搖嫩綠墻桃半綻嬌紅佳辰令節難再旅
况春愁何窮
依稀驛館江北多少人家崦西雲去閒拖驟雨日
斜忽放晴霓

寒食寓鳳山

張瑾

異域逢寒食時當三月三
百花香冉冉萬柳綠毵毵

心每馳天北身猶在海南風光凝別恨觸處揔難堪

其二

寒食常年住 帝畿今年寒食在東夷滿天風雪烏
啼處正是愁人魂斷時

次韻

徐居正

誰家踏青處五五更三三山杏紅初艷汀莎綠正
甦風光連海北雲物勝江南時序今如此馳驅我
不堪

西笑君今向 帝畿一年春事已辛夷清明寒食
連三日急雨顛風似昔時

清明寓黃州有感

祁順

禁煙時節一登樓
剪剪輕寒襲晏裘
感別肯辭浮白
飲惜春還愛踏青
遊松楸萬里鄉關思
風雨千山客路愁
槐火石泉時入夢也
驚身世在黃州

次韻

徐居正

長程催馬爲登樓
小雨霏霏欲濕裘
莫遣青春空寂寞
擬招黃鶴共遨遊
晴川芳草新添興
落日浮雲惹起愁
辜負良辰足可惜
一生猶幸識荊州
妙手推君五鳳樓
贈來珍重鷓鴣裘
羲之觴詠曾修禊
司馬文章又遠遊
沂水春衫可言志
曲江破

帽枉生愁芳辰勝地題詩處豪氣須看隘九州

次祁正使韻

張瑾

細雨紛紛灑玉樓輕風陣陣上貂裘握蘭修禊迎新
樂曲水流觴集勝遊啼鳥數聲春漸老飛花一點客
添愁松楸夢斷家山杳却把黃州當帝州

次韻

徐居正

百五風光更上樓故園何處是菟裘我因遊宦迷
佳節君憶長安說勝遊千里關山千里夢一番風
雨一番愁香車寶馬誰家會惆悵今年滯遠州
日暮行裝獨倚樓春衫未試尚重裘還家揔說江

南好作客其於海上遊紅雨落花生晚興綠煙芳
草長新愁三分春事二分過醉閱關河數十州
向辱國王餞別嘗奉小詩而意猶有缺也矧
未別之前承致贐禮甚厚雖不敢祇領而於
盛德豈能少忘哉途中懷仰日深因輟七言律
十章用表惓惓之敬倘不以爲拙時一展觀千
里猶覲面也

祁順

詔下天門寵渥新東藩人物入陶匄唐虞聲教覃
荒服孔孟詩書溢海濱百政修明誇令主一心匡
輔總賢臣河山帶礪今猶昔應共皇圖億萬春

其二

八道山川奠一方追思前古事茫茫局堂置後人知
學金帶封還歲不荒聖代修文恩誕布賢君奉
貢禮超常星輶記得經行路草木無情亦有光

其三

神嵩北岳入雲青人傑由來識地靈邦國大平常驗
海歲時豐約慣占星越裳修獻厯重譯晉悼中興屬
妙齡遍采民風供使職便須陳奏徹天庭

其四

客路盤桓月已三馬蹄隨處歷巉巖玄菟舊域江爲

塹紫鳳新書玉作函匭有包茅時入貢囊無薏苡不生
讒漢城回首相思切謾托飛鴻寄一緘

其五

箕疆迢遞接新羅眼底皇華次第過魯國望尊周典
禮文侯勲重晉山河蓬萊仙去波濤渺霄漢春來雨
露多滿路耄倪瞻使節歡聲頻作太平歌

其六

外域梯航萬國通朝鮮近在海雲東君臣治道光前
烈人物衣冠有古風八教條章終不改三京形勝久
稱雄農桑樂業邊塵靜正圓吾皇德化中

其七

天澤旁敷遠近霑使臣
咨度遍窮閭陸生何用千金
贈穆叔猶能五善兼驛路
雲山渾舊識詩囊風月記
新添西行漸覺京華近
靄靄紅雲馬上瞻

其八

淺薄無由贊盛時
只憑忠赤答恩私
吟多耻售雞林
價客久常懸鳳闕
思山似畱人多
北聳水因歸海盡
東馳臨歧莫怪辭
行驢揚震從來畏
四知

其九

營州東畔古名區
耕有田疇讀有書
果下盡乘三尺

馬筵中多尚八梢魚綠通長白江分後紅映扶桑日
上初自入 聖朝文物盛不應還比舊扶餘

其十

一片歸心淚水頭 王程那得再淹留玩餘易象深
知魯辭罷形鹽不辱周聚散有期空悵憶王賓無愧
復何求漢城樓館今宵月誰捲珠簾上玉鈎

黃州近體十律承雅教奉酬

徐居正

真主龍飛鳳曆新綢繆一氣轉洪勻星辰北拱環
天上聲教東漸及海濱治軼元和謌聖德才多炎
漢頌賢臣新聞鶴禁三朝慶益鞏瑤圖萬萬春

盛代車書混四方際天極地接微茫周官禮樂尊
中夏禹貢山河罄外荒北闕違顏同咫尺東藩荷
澤異尋常君臣齋沐聞天詔在筭推恩又寵光
仙輶飛渡鴨江清爲播綸音示寵靈愛日已能
兼畏日使星知復帶文星晉朝人物推祁子唐室
功名數九齡專對歸來紆睿眷好將勲業佐宸
庭

聖皇至治已登三猶復民天顧畏巖禮樂三千追
雅頌山河百二壯殽函鳴岡有鳳爲周瑞吟澤無
人怨楚讒似說明良賡載盛煩君珍重寄遺緘

句麗鼎峙濟兼羅往事茫茫瞥眼過隋將胡然經

薩水唐兵無復渡遼河金元僭竊并吞久幽薊紛

紘戰伐多四海卽今清似鏡漢皇空賦大風謠

檀王元不與周通箕子封來履大東

朝鮮始祖檀君與堯並立

於戊辰至周武乙卯而終

五畝田桑姬制日八條治化禹疇風

龍蛇分戰曾三國雞鴨神功又一雄自幸朝鮮逢

聖代百年文物大平中

高麗王建統合三韓有先操雞後搏鴨之讖雞指雞

林鴨指鴨綠也

東風草木雨新霑驅馬從君遍海閭當代文章應

獨步一身忠孝自雙兼無錢可贖囊應溢有句如

神稿自添擬見使還前席罷潭潭相府具民瞻
黃甲才名擅一時民曹清切荷鴻私詩曾雅古追
高適賦或鋪張倒左思任重周官時地利才高大
雅賦驅馳使華清節如君少姓字東韓草木知
堂堂豪氣吐虹霓磊落胸中萬卷書擬向明廷瑞
麟鳳肯從爾雅註虫魚措書獨繼永和後詩道中
興大曆初不分當年陪杖屨霏霏玉屑笑談餘
朝鮮邈在海東頭使節言旋不可畱國俗由來心
變魯藩邦終古義尊周涵濡 帝澤天同大藉甚
君才史可求老我胸中多少策臨分含笑看吳鉤

重渡大同江舟中承祁大人命先賦一律以稿
求正

張瑾

沮江迢遞又重過北望長安奈遠何兩岸好山經雨
碧一川新水入春多蜃雲起處時時異黃帽訝來字
字訛醉後推蓬頻俯鑑瑩然恰似鏡纔磨

次韻

徐居正

要遣蘭舟取次過晚來詩興奈狂何大同江上春
光好浮碧樓前月色多心本虛舟那彼此語憑重
譯半澆訛醉中爲贈干將劒霜刃如新十載磨

重過大同江

祁順

浮碧樓前兩度過煌煌龍節照江沱日輪穿動浪花
碎雨脚積來嵐氣多怪石槎牙撐砥柱靈源迢遞接
銀河前朝爭戰無窮恨都逐春風入棹歌

次韻

徐居正

淚水吾今幾度過故都興廢淚雙沱天荒地破江
山變物換星移歲月多過客每瞻箕子廟行人遙
指發盧河隋唐渺渺俱陳迹不用登臨慷慨歌
天上星官海上過雨分恩澤更滂沱日移簾幕花
陰轉春擁樓臺柳色多滿眼芳菲驚節物傷心送
別隔關河醉中遮莫傍人笑更起樽前擊劒歌

大同江舟中敬和佳作

祁順

高吟恐驚水底龍，促席緩酌何雍容。
樓船蕩槳起煙浪，疑是米家書畫舫。
沙頭對立雙鴛鴦，驚飛直傍雲山過。
主人愛客事遠迎，錦筵吹徹雲和笙。
江醅滿泛春葡萄，醉看兩頰生紅桃。
魯城山色連雲煙，就中綽約多神仙。
追隨無路空大笑，學仙不似還家好。
九重深處明光宮，環珮亦與羣仙同。
人生天地任去留，肯甘海外違中州。
感君瀛洲塵九斛，却愧臨歧酬未得。
明朝別去天渺茫，馬前逕路多羊腸。
相思一夜頭堪白，鳳凰山高鴨江綠。

原韻

徐居正

天上之星人中龍風彩濯濯春風容沮江暖添桃
花浪錦纜牙檣搖畫舫城頭柳色黃如鵝白鷗似
雪雙飛過浮碧仙人來相迎芝輪羽蓋吹鸞笙銀
瓮試開紫蒲萄玉盤爲獻千年桃人間俗子浩如
煙喜一得見瀛洲仙瀛洲之仙亦一笑白日政長
青春好上帝高拱蓬萊宮待君瑤池懽宴同浮碧
仙人挽不留飄然駕鶴還帝州只有驪珠三萬
斛散落人間收不得天漠漠江茫茫送君霄漢空
斷腸朝天石上雪浪白麒麟窟前春草綠

寄題箕子廟

祁順

曩余謁箕子廟嘗賦之矣使旋欲弔其墓弗
遑也因再詠此以洩余思雖視前賦所云未
免重複然言之不足而再言之其亦古人之
意歟

被髮佯狂豈爲身恐看家國遽沉淪平生方寸誰能
會孔氏三仁語最真

其二

宗祊顛覆力難支強抱瑤琴只自悲一曲清歌欲流
涕故都回首黍離離

其三

直諫無能悟獨夫
明夷心事有誰如
九疇不向周王授
後世何由識洛書

其四

東藩制度舊封君
千載遺風尚禮文
欲弔英靈何處覓
淡煙荒草鎖孤墳

次韻

徐居正

邦國興亡繫一身
玉杯其奈竟商淪
可憐誥語敷心處
歷歷忠誠已露真

大厦元非弱木支
三仁心力可堪悲
東韓蕉荔千

秋祀寂寂殷墟草自離

直以忠言忤一夫操琴幽憤可何如九疇一爲周
王授千聖相傳自有書

分茅東土後檀君禮樂詩書粲有文萬古朝鮮民
受賜一杯聊復酌孤墳

重過大同館

張瑾

航海梯山遠郵亭扁大同朝廷新德意胡越一皇
風使客歸心切陪臣禮節崇題詩揮彩筆獨愧未能
工

次韻

徐居正

箕都形勝地時復一樽同水漲桃花浪船搖柳線
風使華名已重藩國禮尤崇酬唱曾非分還慚語
不工

重過安興館

張瑾

安興重駐馬乘興更題詩野樹千章合晴峰四面奇
水聲羌笛韻月色禁城思歸路知天近和風拂面吹

次韻

徐居正

張旭傳神筆徐凝愧惡詩樓臺重會合雲物又清
奇樽酒生前夢江山別後思一聲何處笛人在晚
船吹

萬景樓用陳內翰韻

祁順

當年傑構出埃氛，踪跡猶存舊所聞。
遠近人煙城斷隔，高低田畝路平分。
青連北塞千峰杳，綠漲東溟一水沄。
安得乘閒頻到此，共憑詩酒樂朝曛。

其二

客程西去指京畿，三月殊方未授衣。
遼左晚山經雨碧，薊門春樹帶煙微。
情耽勝境雙眸豁，詩入行囊萬象歸。
仙鶴不來天地老，白雲空傍故簷飛。

次韻

徐居正

畫棟瓊樓拂紫氛，登臨勝槩愜前聞。
山橫野外爲

鬢細水到灘前燕尾分身世却疑凌汗漫文章長
愧乏齋汙夷猶直擬招黃鶴倚柱微吟日又曛
燕山回首是 皇畿客路東風吹蒲衣日暮湖光
迷歛灩雨餘山氣轉霏微天長獨鳥穿雲去浪淨
孤舟緩棹歸南去北來春亦暮轉頭時序疾於飛

重登百祥樓

張瑾

高樓重上思綿綿醉酒凭闌望遠天海浪浴紅朝出
日樹林堆碧晚生煙迢迢野岸多行客渺渺江波有
釣船莫怪疎狂重畱戀箇中風景摠堪憐

其二

星槎東去復西還渺渺安州一望間風送輕寒連日
雨波搖青影隔江山大平世界人來往百尺樓臺水
繞環醉倚危闌望歸鴈數行書寄慰親顏

次韻

徐居正

滿汀芳草綠芊綿納納江湖萬里天
湫灩波光靜沉壁空濛山氣暝生煙
蒼崖斗絕蔽僧寺白鳥輕飛送釣船
始信人間有仙境紅塵身世復堪憐
閒倚闌干坐大還一樓高插斗牛間
潮生水國是官渡日落海門知遠山
身在江湖思魏闕夢隨鷁鷺響朝環
人生會合無多地樽酒風流可解顏

復用前韻

萬里關山正渺綿
帝都西去路如天
盧溝曉接遼東月
碣石晴連薊北煙
雪盡更回高嶺馬
春深穩泛潞河船
星輶欲挽思難得
脉脉相望只自憐
使罷行行得意還
蓬萊矯首五雲間
乾坤自繞雙龍闕
日月常低萬壽山
上苑開花金燦爛
御溝流水玉回環
君歸前席應敷奏
咫尺重瞳識聖顏

重過清川江

祁順

一月重過薩水頭
春風歸旆暫夷猶
波流不盡英雄

恨山色猶含今古愁
碧草晴沙金勒馬
青尊瑤瑟木蘭舟
橫空獨鶴飛鳴去
錯訝坡仙赤壁遊

張瑾

九十春光欲盡頭
三千客路莫夷猶
乘槎不盡張騫興
補袞徒添仲甫愁
日射密城飛野馬
風吹薩水動孤舟
何人肯獻南飛曲
也把今遊當昔遊

次韻

徐居正

萬景樓前古渡頭
一尊相對更夷猶
孤帆破浪動高興
春草滿汀生晚愁
老我幸叨徐孺榻
傍人錯比李膺舟
江山如此人如玉
赤壁何曾擅勝遊

博川江用前韻錄上求教

亭午來過博水頭從教緩棹小夷猶供吟且可商
量飲惜別新添自在愁身世吾今伏櫪驥功名誰
是濟川舟玉堂天上長年事夢裏何曾記舊遊

重過博川

祁順

昔日東行半踏冰歸舟一葉喜同登頭青却笑山藏
佛眼碧翻疑水有僧楚澤携來萍似斗齊樽傾盡酒
如澠遊觀總是江南趣只欠佳人唱采菱

張瑾

三月江頭已泮冰歸舟一葉共君登空山幽寂時聞

鳥古寺荒涼不見僧
花發禁城春似海
宴開勝地酒如澠
風光儘可添詩料
何必吳姬唱采菱

次韻

徐居正

東風吹暖已消冰
官渡孤航又共登
野馬飛時狂是絮
春山燒盡禿於僧
不堪客裏愁如海
須借樽前酒似澠
日暮傷心是何處
一聲清唱半江菱

復用博江詩韻以寓景慕之意
離別之恨錄奉文侍下
若一賜覽足知區區下情矣

使華清節蘖兼冰
深愧龍門忝一登
詩句曾驚癰似鶴
行裝自信淡於僧
嘉山落日紅蒸藕
車嶺垂

楊碧染澠明向江頭持贈客晚汀何處採芳菱
丰儀灑落出壺冰萬里通津已立登原道昌黎文
表佛能詩鄭谷字多僧宮袍賜處紅翻錦御醞
頒來綠漲澠一別雲泥迥相隔思君日日採江菱
適蒙惠詩感甚依韻奉答愧不工耳

祁順

東海清游勝踏冰好山何處不同登仙棊柯爛驚樵
客詩壁紗籠付野僧眼底乾坤低峒嶺胸中雲夢小
溜澠黑頭勲業還相勉莫待秋霜點鏡菱

其二

人物風流出壑冰青雲要路美先登才高堪稱廟堂
客心淡不殊雲水僧磊落酒懷深徹海瀾翻詩思浩
逾澠筆端造化須臾事絕勝劉生詠採菱

其三

盡日狂吟愧鏤冰小樓春景愛頻登滿郊芳草多逢
牧一路名山半屬僧謾把笑談窮宇宙底須殽酒比
陵澠清時君相深知遇孤負紅香海上菱

昨承和韻相別日逼情不自勝又和原韻以
抒下情

徐居正

松竹高標傲雪冰

聖朝良俊已崇登調和可作

鹽梅相迂濶終非粥飯僧鈍似駑駘寧望驥才高
湖海莫言澠海東儒老中華使肝膽唯應照鑑菱
正坐儒冠冷欲冰一生豪氣愧陳登空疎自信無
腸子清苦真成有髮僧培塿何曾齊華岳隴瀧應
亦讓齊澠葡萄苜蓿非吾有爲採江蘺間海菱
鵲岳龍灣已泮冰送君時復費攀登相思脉脉傷
春女獨坐寥寥結夏僧天上有人瞻北斗人間無
酒變東澠驚心莫唱陽關曲不似當年聽採菱
銷愁恨不似春冰有水可臨山可登畱飲敢同投
轄客輕裝大勝打袍僧終期泰礪仍河帶不用殺

陵復酒澠日暮離亭多少思東風吹盡滿江菱
文章李杜筆陽冰端合瀛洲十八登逃酒敢期蘇
晉佛畱衣曾笑退之僧千軍詩陣能摧岳三峽詞
源可倒澠他日八珍天上宴倘能記我海東菱

承和詩有所興起遂依韻再奉五章但覺擣殘
椒桂有餘辛矣

祁順

清銜珍重一條冰藩國崇階取次登載酒問奇非俗
客話禪畱偈只高僧齋淪道脉洙連泗浩漈詞源海
接澠還想公餘多逸趣扁舟閒采漢江菱

其二

五色絲蠶每熟冰滿田禾黍又豐登柴門不閉稀逢
盜粒食羸餘但施僧菁匭修誠通上國江醅浮艷勝
東澠况逢司牧多龔遂渤海年來盡蓄菱

其三

楊柳花飛訝剪冰曉來欄檻拂衣登才堪詠雪誰家
女心似黏泥何處僧鶴伴行途清比蜀馬經灘水急
於澠回思鄉曲頻年別老却南塘幾度菱

其四

春寒猶覺硯生冰千仞騷壇未易登石鼎聯詩慚道
士金山畱帶愧仙僧家居越水遙隣楚路入齊郊慣

皇華集
渡澠誰料年年持使節又從東海問芳菱

其五

當代權衡一鑑冰瀛洲人物似仙登文章不敢干明
主骨相何勞問老僧浪說驪黃分牝牡誰因風味別
溜澠含情更把菱花對漸覺新菱變舊菱

次韻

徐居正

春溫如玉旋消冰與客東臯一嘯登蕩槳誰家採
蓮女携筇何處化糧僧山曾未了青如岱水自無
邊綠似澠日暮香風吹不斷江湖滿地無數菱
爲喚瓊漿小點冰晚樓扶醉快重登畱侯有骨還

同婦房琯前身定是僧宦路崎嶇危似棧光陰荏
苒疾如澠平生幾度關西路又見春光已上菱
先生藻鑑炯如水不分詩壇共許登語妙君非煙
火客氣酸我似蔬筍僧蛙曾守井寧論海鯨已吞
江不用澠衆卉紛紛空滿眼崇蘭香芷異殘菱
殘年心事似雕冰壯歲匀天憶夢登獨坐真成卧
遊客遍叅不如行脚僧心隨江漢能朝海思入臨
淄欲訪澠何日從君東廣去吳江楚澤討蓴菱
十年宦海履春冰無計飛揚要路登晚節香山思
鬻妾中年靈運酷耽僧虛名何用隴兼蜀真味不

殊溜與澠南望達城家萬里夢魂長繞故園菱

重過林畔館

張瑾

使館正依林畔構輶車不厭往來勤凭闌目送天邊
鴈遙指中原認五雲

次韻

徐居正

不分龍門揖盛芬天涯樽酒叙殷勤他時知我相
思處渺渺江東日暮雲

奉別兩使大人

傷心遠別白頭新鴨綠江頭酒數巡篋有珠璣詩
總好車無薏苡橐全貧帝思宣室虛前席人自藩

邦望後塵珍重角弓嘉樹傳流傳亦不愧前人

其二

初旭暉暉映錦袍還朝知復列諸曹天闕閭闔星
辰近雲擁蓬萊日月高帽壓宮花紅躑躅甕分宣
醞碧葡萄大平文物追周雅爲奏皇華慰獨勞

義順館中畱別叅贊徐君居正叅判李君克墩
承旨柳君瞻兼東國中諸君子 祁順

賓館琴樽遇賞音別離何事獨關心春隨行客寒猶
劇草怨王孫綠已深鄉國念多頻積夢江山看飽懶
成吟莫言歸橐渾依舊新贈詞章抵萬金

其二

煙光如畫水如苔共把深情付酒杯
藩國不勞金塔獻使臣非爲玉環來
斯文交誼寸心在遠道歸程一騎催
後夜月明相憶處大平樓館郭生臺

次韻

徐居正

白頭身世少知音枉費機關十載心
龜木千年緣不淺我洋一曲趣尤深
春風無盡相思調落日空成惜別吟
自古贈言仁者事新詩珍重勝南金
青青官柳碧於苔三疊陽關酒一杯
馬自籊雲天上去鳳曾噉詔日邊來
浮雲聚散傷心事流水光

陰瞥眼催一望燕山四千里相思莫上最高臺

叅判李克墩

持節東行播德音才名足慰遠人心陽春白雪詞
多妙流水高山趣又深上苑煙花頻入夢異鄉雲
物盡供吟我叨王命來相送愧乏華筵直一金
鴨水粼粼綠似苔變成春酒入離杯煙分渡口橫
舟去海送潮頭激岸來惜別又驚春欲盡裁詩不
用雨相催好歸鰲禁追仙侶倘記陪遊江上臺

承旨柳 瞻

慶衍青宮播玉音東韓民物盡傾心使節從天星

遠照 皇恩特地海同深浮雲落日生鄉思勝水
佳山助客吟篋裏新詩凡幾首贈來無字不千金
汀草萋迷間綠苔別筵知復爲傳杯亂雲無賴聚
還散輕燕多情去又來幾線柳條離恨苦一聲畫
角起程催 聖皇竚待應虛席好去蜚騰上玉臺
承雅教題遼東醫生孔志學惠愛堂詩卷

徐居正

家傳洙泗術岐黃皮裏春秋肘後方藥有君臣劑
入妙火分文武鼎生香對君浮白金杯灑遺我還
丹玉粒光珍重更煩三昧手年來詩酒已膏肓

居正

遇孔君於鴨綠江偕至漢京又送江頭陪遊浹四旬孔君又遺我妙劑

余偕行人司左司副張君奉命至朝鮮而司

譯院正張有華爲通言使從行日久恭慎益至

因其求詩也書此以畀之

祁順

天子命兩使東來經海隅鴨江抵漢城尚有千里餘
邦人遠相迓心類語則殊侏僂徒聒耳刺刺不受呼
賢哉張司譯承遣自藩都辛勤待行李跋涉凌脩途
語言賴以通恩德由以敷往回逾一月恭慎恒如初
送行至江滸欲別還踟躕願求片言贈永比明月珠
吾言不足重子意寧可虛霜毫一揮灑聊以答勤渠

越裳肇重譯周禮名象胥勉旃効厥職次第登亨衢
余使朝鮮其國遣司譯院正張自效隨侍逾月
將別求詩乃賦此以塞其意

藩語華音兩熟閑登庸有路任躋攀東藩司譯勤官
守北闕觀光慣往還拜 詔遠馳千里外通情全仗
片辭間使輶臨別難爲贈拂簡題詩一強顏

重過鴨綠江

張瑾

歸舟一葉渡中流蕩漾輕於水面漚安得江風有神
力片時吹上五雲頭

次韻

徐居正

歲月悠悠水自流人間萬事似浮漚明朝鴨綠江
頭別一曲陽關白盡頭

鴨江別徐君議政

祁順

海國詩書彥推君第一流相逢頻下榻到處共登樓
瓊玖難爲報明珠不暗投臨分意何限東望緩移舟
其二

江頭停旆久尊酒伴情深別去翻疑夢交來已見心
清才謔白雪高誼薄黃金明隔關山遠盟寒豈易尋
次韻

徐居正

送君一杯酒不覺淚雙流分手空臨水傷心莫上

樓曳裾嗟已晚結襪分纔投極目長汀晚遙遙望
去舟

時序驚春晚離愁抵海深陪遊兩月事交道百年
心潭淨玲瓏玉灘喧破碎金遼陽是何處魂夢正
相尋

又用前韻

隱隱鵲山晚悠悠鴨水流頴濱方仗節王粲更登
樓已見輒初發何能轄可投渡頭人散盡落日下
孤舟

交際皮毛少斯文骨肉深傳名思驥尾虛譽忝牛

心價倍連城壁才慚躍冶金百年離別恨歲月老
侵尋

江濱畱別柳承旨

張瑾

星槎西上駕天風渺渺滄波去不窮作使每憐千里
別故人又喜一樽同吟餘佳句詩情逸覽徧名山眼
界空明日相思何處是暮雲回首隔江東

孝思亭爲議政盧君賦

以下四首
賦以途作

祁順

音容淪逝杳難追一念悠悠不盡期仕路久懷風木
歎文房曾廢蓼莪詩蕭條霜露關心日恍惚羹牆見
面時王國只今崇孝治顯揚應慰九泉思

孝思亭詩錄似贊成盧君求正

張瑾

風雨暗高堂春萱一晷亡詩書遺手澤針線在衣裳
每對羹牆見空成藜藿傷幾回愁夢覺號泣斷肝腸

題狎鷗亭

祁順

瀟灑衡茅漢水東主人情與白鷗同尋盟肯負沙邊
侶易慮深慚海上翁野渡浮沉千頃雪釣船來往一
絲風相門德業光前後不但名亭比魏公

狎鷗亭

張瑾

閒亭清占漢江隈亭外江鷗自去來一片機心渾忘
却尋常相近不相猜

渡鴨綠江西還

祁順

旋旌自東境暖帶陽春脚冰消馬訾水一派從天落
東風開別筵沙際橫翠幕香醅浮鴨綠灩灩供杯酌
醉中上蘭舟風靜波不作魚龍亦來勝先後爭踴躍
平生一寸心自省無愧怍名山與勝水隨處堪行樂
却聞吳惠公曾值風濤惡怡然對黃卷不異在齋閣
波靈識賢俊詎忍肆陵虐忠信通神明斯語誠匪錯

次韻

徐居正

西日淡芳渚輕煙翳林薄汀草綠更纖巖花開又
落長風從何來吹吹捲雲幕此時開別筵獻酬無

筭酌君詩三百篇——皆佳作浩若江海翻蔚然
龍虎躍而我才短拙自視寧不忤人生有聚散世
事雜悲樂忽爾長別離令我懷抱惡行行策驂驪
去去上臺閣傷心馬訾水奈此風濤虐君有濟時
手行看試盤錯

鳳凰山

定州禹判官回自遼陽賁來凡三首

祁順

峰巒環合勢參天壘石高城尚宛然曉日梧桐應有
鳳白雲樓觀豈無仙唐皇駐蹕幾千里遼王開疆二
百年欲訪舊碑何處覓馬蹄衝破洞門煙

八渡河

久說東寧八渡河客程今日厭經過寒流曲傍青山
轉亂石橫衝碎浪多萬里邊塵憑淨洗千金寶劒爲
重磨臨清悟得滄浪意欲和當時孺子謠

高嶺東望

玉削芙蓉插碧霄人從飛磴躡山椒石門日暖嵐猶
濕水洞春回凍未消鴈塞北臨遼境濶鴨江東隔漢
城遙斷雲殘雨天涯路不唱多情望海潮

次韻

徐居正

鳳凰山色蔚齊天鳳去山空事渺然雉堞有基棲
孽虜鶴樓無地訪飛仙江山麗濟分爭日天地金

遼割據年我亦開州曾弔古長林老樹鎖寒煙

右鳳

鳳山韻

複嶺重岡八曲河少年曾此再經過鱗鱗細浪涵
風皺咽咽寒聲得石多壯歲羈懷殊跌宕老來豪
氣半消磨如今髀肉生如許慷慨時時拔劍譟

右八

渡河韻

高嶺岩峽插半霄憶曾騎馬渡山椒一區風月詩
新就萬壑煙嵐畫不消日下長安看漸近天涯海
國望還遙荒涼野次渾無寐半夜松聲細送潮

右高

嶺東望韻

山行紀東寧土俗

祁順

村落隣邊境人家得自由山深餘草木地濶有田疇
毛革充常獵糧芻足歲收胡塵不侵擾官府少徵求
老禾諳時事居常守故丘誅茅添屋蓋編柵固墻溝
剪紙爲神像澆糠當燭油耄倪多赤脚女婦總盤頭
木器勝陶冶麻衣卽褐裘泥盆燒炭火空樹斫煙樓
居寢渾無別生涯正若浮語音淪外國禮俗異中州
境土雖云樂民風實可羞采搜渾未盡欲詠更夷猶

光山下營

渺渺平原面面山亞夫高卧柳營閒春雲散作龍蛇

陣夜柝嚴於虎豹關金吹一聲天地外劍光千丈斗
牛間行當借此三軍便翦却殘胡奏凱還

右二詩乃僕東行之時過遼陽境外所作也
以其地近朝鮮因錄去一看其遼陽道中有
作不能一一遍錄

開州道中遇雪

開州東近鴨江涯路指遼城八站賒三月尚寒山有
雪一春將盡樹無花金元拓境人何在秦漢修疆事
已遐守在四夷今可信普天咸屬帝王家

九連城

此地何年罷戰爭春風猶鎖九連城遼東老鶴歸來
晚四野無人草自生

董家峪

古洞深中別是春煙霞爲侶石爲鄰桃花流水門前
路恐有秦時避世人

右三詩乃僕西還之時過鴨江後所作也錄
寄之意亦同於前餘不能一一

金通事由慶之還獲覩盛作不勝喜抃謹依
韻奉和勿以荒拙見誚

徐居正

昔過東寧路鄉風訪所由俗曾存儉朴人自業耕

疇黍粟田宜性桑蠶利倍收遐荒寬賦稅胥吏絕
誅求昏媾同閭落畋漁共壑丘茅茨連棟宇樹木
蔭田溝瓦甕晨芻酒沙缸夜潑油笑談喧柵內譌
鼓賽祠頭零落防身劒蒙茸御膳裘居常鄰醜虜
日復戍邊樓雨露皇恩大乾坤協氣浮煙塵靜
四海風化覃九州禮俗人皆變訛音爾可羞咨譟

使者事辰告是良猶

右山行紀東
寧土俗韻

良將鎮邊屹似山營高細柳馬嘶閒龍堆鴈塞誰
分塹鐵甕金城又壯關早識陣雲明眼底試看霜
刃吼腰間請纓我亦從軍去不斬樓蘭未擬還

右光

山下
營韻

東海茫茫天一涯
開州西去站程賒
二年客路連逢雪
三月邊城不見花
孽虜孤棲城郭在
胡元強噬歲時遐
朝鮮萬古藩維壯
聖代車書混一家

右開州道
中遇雪韻

聖皇千舞息紛爭
衛霍當朝萬里城
謾向策廷論

表餌賈生真箇是書生

右九連城韻

東藩世世奉

王春有道曾聞守在鄰
寵命荐加

天子聖巡咨大雅
豈無人

右董家峪韻

奉國王書

欽差正使戶部郎中祁順端肅奉書朝鮮國王僕
不敏辱承聖天子明命以抵於斯自入境迄今餘
一月矣始也聞王之德譽而傾慕焉中也覲王
之規範而起敬焉終也感王之禮意而眷戀焉
王之天資英邁學力純至行已接人悉有儀度其於
尊事朝廷以及行人之禮盖無不至者至於僕所以
自處則恐王未克盡知也聞之左右皆謂僕之斯
行凡餽儀贐禮一一力辭於盛意似有所不愜噫君
子之交際豈專在乎物哉贈行有贐王之禮也不
貪爲實僕之心也主賓各盡其道而無愧焉斯足矣

不恭之愆僕所難避然賴高明有以察之因叅贊徐
居正送別將還專此奉達居正有文學乃王所信
任者而遣以相陪周旋日久則王所以厚僕於斯
文之意豈淺淺哉臨楮未罄所懷末間惟希珍愛以
副遠念成化十二年三月初十日順再拜

又

奉別以來瞻戀弗置沿途蒙遣官問候款待有加僕
從而下無不霑惠茲抵鴨江而叅判李克墩承旨柳
睦已先至此所以迎勞宴餞有恪無懈者皆王之
盛心也不意行間承旨復以來命出貂裘見遺則似

乎不甚見知者豈謂前日區區之弗受餽贐爲虛僞耶不然何寓館之辭已畢而千里之贈復來也昔晏嬰一狐裘三十年君子不以爲陋僕雖至愚未嘗不賢哲是效茲焉衣一弊裘猶未及三十年之久其肯舍舊貪新以易吾心耶况物有盡而情無窮則所以感王之深者又在情不在物也用是再辭幸無見咎行忙作書草率希亮恕不宣成化十二年三月十二日順再拜

謁孔廟詩序

余仕中朝聞外國之有文獻者以朝鮮爲稱首其人

業儒通經尊崇孔聖之道匪直守箕子遺教而已茲
余奉 天子命偕行人司副張君廷玉來使其國
恩詔旣宣卽謁孔廟於成均之館館在國城東北隅
地最高爽其廟五間扁曰大成殿祀典與中華同殿
後有明倫堂堂後有藏書閣諸生肄業者三百餘員
索其所習詞賦策問觀之亦中華體製也宴坐明倫
堂中值雨良久廷玉賦謁廟詩一絕余亦作七言二
律其一則爲諸生勉焉藩臣在席者凡八人咸依韻
賦之且願一言序作之之意竊惟孔子之道徧於四
方行於萬世而朝鮮能宗斯道以雄于東亦爲知所

重也已宋史稱其俗喜讀書庶賤之家各於衢路置局堂以相講習而國人金行成崔罕王彬相繼就學於國子監擢進士第而歸則詩書薰陶已非一日我皇明文教誕敷東漸尤近朝鮮人士歲覲京國耳聞目覩所得尤深宜其文物典章不異中華而遠超他邦也今諸生學聖賢之學尚思蘊爲道德發爲功業以求高明遠大之歸而不安於苟且卑陋之習斯爲善學者矣若徒屑屑於詞章末技而弗究其本焉則非中國所聞也余之相勉以詩者意盖如此諸生擇乎哉成化十二年丙申春二月下泮賜進士奉政大

夫戶部郎中欽差正使東廣祁順書

北征稿序

詩之道大矣古今異世而詩無間也中外異域而詩無別也蓋道之著者爲文文之成音者爲詩人有不同而同此心心有不同而同此道道同則形之言者無往而不同矣苟不於此求之而屑屑焉古今中外之較豈知言哉此余於朝鮮徐君剛中之詩所以有取焉耳朝鮮東方禮義之邦詩派相傳夙有攸自逮際皇明氣化丕隆聲教淪浹能言之士尤彬彬乎視昔有加徐君博古通經擢巍科躋顯仕文學優著

國人咸推重之天順庚辰奉其主命入覲于朝往還幾八千里上則觀乎都城之宏壯宮闕之崇麗車書文物之會同禮樂典章之明備下則觀乎山水之高深道途之脩迥民風土俗之熙皞鳥獸草木之咸若凡其接於目觸於心者悉於詩發焉長篇短章渢渢乎其美盛也淵淵乎其有本也浩浩乎其不可窮也推其所至與中國能聲詩者殊不相遠等而上之雖古人亦豈多讓哉是固所謂心同道同而形之言者無不同也昔陳良北學於中國北方學者未能或之先是以孟氏稱爲豪傑而其名至于今不泯以徐

君觀之其東韓之豪傑歟余承天子命來使朝鮮

適君爲遠迎使旣又陪于館中送于鴨江之上相與
凡四浹旬山川風物倡酬殆遍用是益信其能也君
以余有斯文之雅出其北征稿請言序之余忝使職
正思采東人之詠以觀所缺王事不得至焉則漢

江之遊非偶然耳然斯遊豈特探奇覽勝畱連詩酒
而已哉江之南舊百濟也百濟之東古新羅也而熊
津都府又唐之遺址也訪其迹思其時盖有不勝懷
古者矣余念斯遊之不可常而恐其或忘也於是乎
記之賜進士奉政大夫戶部郎中欽差正使東廣祁

順序

國步士志如天失民勝中益益五穀東漸漸

古者失余念慎發之不祥也

事無執入費之費世也古之金銀易其執益而不

國子監丞之南書百卷之自德仁一與士海學以而

五之執非開然平太進致豈赫亦有麗頌

田采東人
之得此
為
本
三
每
不
得
限

以余月池大兄一語中其大旨辭語皆我之所欲言

入國天會山相風林會體杯鼓風具益計其湖必喜

商三書多與劉子中安平調玉之土脉與

皇華集卷之九



余奉天子命來武陽



華

自

五